

四庫全書

史部

欽定四庫全書

史部

欽定續文獻通考卷二百四十二

主事<sub>臣</sub>陳若霖覆校

總校官內閣中書<sub>臣</sub>孫溶

欽定四庫全書

欽定續文獻通考卷二百四十二

四裔考

西南夷

雲南土司

明太祖洪武十四年詔諭雲南諸郡蠻

時大軍至滇梁王走死既置雲南府自是諸郡以次

來歸

明史土司傳曰雲南諸郡垂及累世規制咸定統而稽之大理臨安以下元江永昌以上皆府治也孟艮孟定等處則為司新化北勝等處則為州或設流官或仍土職今以諸府州縣列之土司者從其始也蓋滇省所屬多蠻夷雜處即正印為流官亦必以土司佐之而土司名目淆雜難以縷析故係之府州以括其所轄而於土司事迹止據其大綱有闕乎治亂興亡者俾控馭者識所鑒焉

臣等謹按雲南即滇國也馬端臨考始於楚頃襄

王使莊躋畧地至滇終於蜀漢諸葛孔明置雲南

郡今以明史雲南土司傳考之則隋置昆州隋志無昆

州唐志昆州注本隋志隋亂廢考隋書南寧州蠻蠻亂拜昆州刺史叛服不常故志不載耳唐

仍之後為南詔蒙氏所據改鄯闡府歷鄭趙楊三

氏至大理段氏以高智昇領鄯闡牧遂世其地宋太

祖時王全斌進滇地圖帝以玉斧畫大渡河為界由是雲南不復通中國元初置鄯闡

萬戶府既改置中慶路元憲宗時收大理國鄯闡府地置鄯闡萬戶府世祖

時改為都關路尋改為中慶路屬雲南行省

封子和克為雲南王鎮之

仍錄段氏子孫守其土和克死其子嗣封為梁王

元世祖既設雲南行省始置郡縣封子和克為雲南王居省城後遇錫堯又立皇曾孫松山為梁王

世守其土

蓋雲南自古為遐荒僻裔蠻貊所居漢武始

開置郡縣隋唐之際羈縻而已迄於蒙段專制一

方元時乃入版圖同內地而道里荒遠史籍無徵

者多矣茲若不從明土司傳體例則名目淆雜誠

難辨晰故雖參稽他書而仍係之府州等分列於

後

又按明史雲南土司凡五十餘今以一統志考之  
惟大理府領長官司一臨安府領長官司五景東  
府有土知府知事順寧府領長官司一蒙化府有  
土知府麗江府有土通判永昌府領安撫司一外  
又領羈縻土府一土州二宣撫司六安撫司二長  
官司一北勝改升永北府領土府一其餘則皆無  
土司矣又徵外附見有舊孟艮土府本邦軍民宣

慰使司猛密宣撫使司孟養軍民宣慰使司鈕兀  
長官司以在荒外羈縻之而已

雲南

明太祖洪武十五年雲南諸蠻寨悉定

先是五年三月命翰林待制王禕齋詔諭梁王

元宗室巴

西爾幹爾密也

久留不遣卒遇害八年復遣湖廣叅政吳雲

往中途為梁使所害十四年征南將軍傅友德等率  
師至雲南城梁王赴滇池死定其地改中慶路為雲



南府至是友德等分兵攻諸蠻寨之未服者土官楊  
苴乘隙作亂集蠻衆二十餘萬攻雲南城時城中食  
少士卒多病寇至都督謝熊馮誠等櫻城固守賊不  
能攻遂遠營為久困計時沐英方駐師烏撒聞之將  
驍騎還救至曲靖遣卒潛入報城中為賊得給之曰  
總兵官領三十萬衆至矣賊衆驚愕宵遁走安寧羅  
次邠甸富民普寧大理江川等處復據險樹柵謀再  
寇英調將士剿降之斬首六萬餘級生擒四萬餘人

諸部悉定

二十六年命西平侯沐英子春襲封仍鎮雲南

自英平雲南在鎮十年恩威著於蠻徼子孫亦皆能以功名世其家每大征伐輒以征南將軍印授之沐氏未嘗不在行間數傳而西平裔孫當襲侯守臣爭之謂滇知有點國公不知西平侯也孝宗以為然許之自是遂以公爵佩印為故事諸土司之進止予奪皆咨稟及承平久文網周密凡事必與太監撫按三

司會議後行動多掣肘土官子孫承襲有積至二三十年不得職者土官復慢令玩法無所忌憚待其罪大惡極然後興兵征勦致軍民日困地方日壞大學士楊一清等因武定安銓之亂痛切陳之黔國公沐紹勲亦以爲言雖得旨先行亦不能更革馴至神宗之世朝廷情媿封疆敗壞日甚一日緬莽之叛皆土官之失職者導之雖稍奏膚功而滇南喪敗卒由土官沙定洲之禍

臣等謹按明史土司傳及雲南通志沙定洲之父源駢勇有將材萬厯中數從征調有功巡撫委以王弄副長官事繼以征建水及東川水西馬龍山等處全雲南會城累加至宣撫使時號沙兵定洲其仲子也崇禎三年元謀土知州吾必奎叛黔國公沐天波調定洲從征定洲不欲行出怨言會奸徒饒希之余錫朋者逋天波金無以償錫朋常出入土司家誇黔府富盛定洲心動陰結都司阮韻

嘉諸人爲內應既定洲入辭行天波以家諱日不  
視事定洲譟而入焚劫其府天波聞變由小竇遁  
其母妻偕走城北自焚而死定洲據黔府盤踞會  
城劫巡撫吳兆元使題請代天波鎮滇傳檄州縣  
全滇震動天波走楚雄從金滄副使楊畏知言走  
永昌定洲至楚雄城閉不得入乃遣黨王翔李日  
芳等攻陷大理蒙化畏知乘間檄城外居民盡入  
城築陣濬隍調土漢兵守之定洲不敢至永昌恐

畏知截其歸路急還兵攻楚雄畏知輒出奇兵殺賊甚衆賊引去攻石屏不下還攻寧州賊計迤東稍稍定乃復攻楚雄分兵爲七十二營環城掘濠爲久困計會張獻忠部將孫可望率餘衆由遵義入黔稱黔國焦夫人弟來復仇民久困沙兵喜其來迎定洲解楚雄圍迎戰於草泥關大敗遁何迷可望分遣李定國徇迤東諸府定洲歸屯兵洱革龍且借南安援自固會可望與定國不協聲其罪

杖之百責以取定洲自贖定國既至定洲土目楊  
嘉方迎定洲就其營宴定國偵知之率兵圍營遂  
械定洲及妻萬氏數百人回雲南剥其皮市中可  
望遂據滇而天波卒走死於緬甸

大理

宋寧宗慶元六年南詔段智連立

南詔卽大理唐葉榆縣境也自明皇時南詔蠻蒙氏  
閣羅鳳叛國於此號大蒙國後改爲大禮國昭宗時

其臣鄭買賜篡位改爲大長和後唐明宗時其臣趙善政篡立改爲大天興尋又爲其臣楊于貞篡立改爲大義寧至晉高祖時段思平得之更號大理國思平死子思英立未幾死其叔思良立死傳子素順宋太祖建隆四年立時王全斌欲乘平蜀後取之具圖以進帝以玉斧畫大渡河曰此外非吾有也由是三百年不通中國素順死傳子素英太宗雍熙二年立死傳素廉真宗祥符二年立死傳素隆天禧二年立



避位爲僧死傳素貞仁宗天聖四年立死傳素興慶  
厯元年立國人以其無道廢之而立思廉至皇祐中  
以儂智高走死大理函首至京始通中國思廉立三  
十一年死傳子連義神宗熙寧八年立爲其臣楊義  
所弑篡位四年段氏臣高智昇遣子昇太起兵討滅  
之而立段壽輝立二年傳子正明元豐五年立後避  
位爲僧國人皆歸心高氏遂奉昇太爲主哲宗元符  
二年立改國號曰大中臨終屬其子太明曰段氏不

振國人推我不得已從之今其子已長可還其故物  
爾後人勿效尤也太明遵遺言求段氏子正淳立之  
而段氏復興號曰後理國高氏世相之人稱爲高國  
王正淳以高太明爲相太連爲柵主遣太連朝宋求  
經籍得六十九家立十三年避位爲僧死傳子正嚴  
徽宗大觀二年立立三十年避位爲僧死傳子正興  
高宗紹興十七年立亦避位爲僧死傳子智興孝宗  
乾道八年立死傳子智連

元憲宗二年命呼必賚征大理

先是宋寧宗開禧元年段智連死傳弟智祥理宗嘉熙三年智祥死傳子祥興元兵攻之逆戰敗死宋遣使祭傳子興智至是呼必賚將兵擊之次年九月次忒刺地分兵三道以進冬十二月興智及高太祥拒戰大敗太祥被擒不屈斬於五華樓下時白日當午忽雲起雷震世祖異之曰忠臣也遂擄興智而有其地設大理都元帥府仍封興智爲摩訶羅嵯管領八

方又以劉時中爲宣撫使同興智安輯其地

世祖中統二年賜大理國主段實虎符優詔撫諭之

迨中原多故段氏復據大理有十一代總管一段實

二段忠三段慶元四段正五段隆六段俊七段義八

段光九段功十段實至十一代爲段明而悉屬版章

遂爲大理府

明太祖洪武十四年授段明大理宣慰使

明之父寶聞帝開基江南遣叔段真由會川奉表歸

款至是征南將軍傅友德克雲南授明宣慰使然明  
猶未降也十五年征南將軍藍玉沐英率師攻大理  
拔其城酋長段世就禽世亦寶之子至京師帝以寶  
曾有降表不忍廢賜長子名歸仁次子名歸義授以  
官大理悉定改路爲府十六年品甸土酋杜惠來朝  
命爲千夫長十七年以土官阿這爲鄧州知州阿散  
爲太和府正千夫長李朱爲副楊奴爲雲南縣丞十  
九年置雲南洱海衛以賴鎮爲指揮僉事洱海本品

旬也兵燹後人民室廬無復存者鎮復城池治廬舍  
市里修屯堡隄防斥堠又開白鹽井民始安輯二十  
年詔景川侯曹震選精兵給軍器農具即雲南品甸  
屯種以俟征討永樂後雲南諸土官州縣率按期入  
貢賜予如制嘉靖元年改十二關長官司于一泡江  
之西從巡撫何孟春奏也

臨安

元世祖至元十三年置臨安路

臨安古句町國漢置縣唐爲羈縻荊州地天寶末南  
詔蒙氏於此置通海郡元憲宗時內附置阿斐部萬  
戶府至是改臨安路屬臨安廣西元江等處宣慰司  
明太祖洪武十四年改臨安路爲府

時征南將軍傅友德等下雲南遣宣德侯金朝興取  
臨安元右丞元卜台元帥完者都及土官楊政降改  
路爲府十七年土官和寧等來朝即以爲土知州等  
官

愍帝崇禎五年官軍討阿迷土知州普名聲

先是名聲之父維藩與寧州祿氏構兵師殲焉名聲  
幼育於官既長有司俾繼父職名聲收拾舊部勇於  
攻戰從討奢安有功仍授土知州漸驕恣至是御史  
趙洪範按部名聲不出迎已出戈甲旗幟列數里洪  
範大怒謀之巡撫王伉請討進圍州城名聲恐使人  
約降而陰以重賄求援于元謀土官吾必奎時官軍  
已調必奎隨征必奎與名聲戰兵始合佯敗走官軍



望見遂大潰布政使周士昌戰死朝廷以起釁罪伉  
逮治而名聲就撫然驕恣益甚當事者頗以爲患已  
而廣西知府張繼孟道出阿迷以計毒殺之必奎聞  
名聲死遂反連陷武定祿豐楚雄諸城寧州土官祿  
永命石屏州土目龍在田俱與必奎名聲從征著名  
至是黔國公沐天波檄之統兵合勦禽必奎名聲妻  
萬氏本江西寄籍女淫而狡名聲死後改嫁王弄山  
副長官沙源之子定洲名聲有子曰服遠與萬氏分

寨居定洲誘殺服遠併其地天波檄定洲取必奎定洲不欲行遂反

明史臨安土司傳曰長官司有九曰納樓茶甸曰教化三部曰溪處甸曰左能寨曰王弄山曰虧容甸曰思陀甸曰落恐甸曰安南其地皆在郡東南西平侯征安南取道於此蓮花灘之外即交荒外而臨安無南面之虞者以諸甸爲之備也但地多瘴流官不欲入諸長官亦不請代襲自相冠帶日

尋干戈納樓部內有礦場三曰中場驚黃摩訶封  
閉已久亡命多竊取之其安南長官司本阿楚蠻  
所居舊名褒古後名捨資元爲捨資千戶所以地  
近交趾安南屬臨安路正德八年蒙自土舍祿祥  
爭襲父職鳩殺其嫡兄祿仁安南長官司土舍那  
代助之以兵遂稱亂守臣討平之事聞命革蒙自  
土官改長官司爲新安守禦千戶所調臨安衛中  
所官軍戍之

楚雄

元憲宗六年置威楚萬戶府

先是晉咸康後爲雜蠻耕牧之地蠻蠻築城名威楚  
宋時段氏改威楚郡至是內附置萬戶府至元八年  
改威楚路後置威楚開南路宣撫司

明太祖洪武十五年改置楚雄府

時南雄侯趙庸取其地改爲府十七年以土官高政  
爲府同知阿魯爲定邊縣丞永樂元年楚雄府言所

屬蠻民不知禮義惟楚種賦性溫良有讀書識字者  
府州已嘗設學教養其縣學未設縣所轄六里楚人  
過半請立學置官訓誨從之

世宗嘉靖四十三年楚雄蠻叛官軍討平之

先是宣德時楚雄所屬之鄉老言南安州俱羅舞和  
泥烏蠻雜類稟性頑獷黔國公沐晟等奏楚雄所屬  
黑石江及泥坎村銀場軍民盜礦千百爲羣執兵攘  
奪楚雄縣賊首者些糾合武定賊者惟等劫掠軍民

殺逆檢張禎又定邊縣阿苴里諸處強賊聚衆抄掠  
景東等衛大理蒙化楚雄姚州皆有盜出沒帝敕責  
及等期以三年討靖諸爲亂者至是叛蠻阿方兵起  
先攻易門所流劫岨峨昆陽新化各州縣僭稱王約  
土官王一心王行道爲援一心後悔詣軍門請討賊  
自効巡撫呂光洵許之招降數百人官軍分道禽獲  
賊黨乘勝克大小木址二寨斬阿方首餘賊悉平

激江

元世祖至元十六年置潞江路

潞江唐爲南寧昆二州天寶末沒於蠻號羅伽甸宋時大理段氏號羅伽部元憲宗四年內附六年置羅伽萬戶府至是改潞江路

明太祖洪武十五年改潞江路爲府

時雲南平潞江歸附改爲府地居滇省之中山川明秀蠶衣耕食民安於業近郡之獠獠性雖頑狠然恭敬官長至則爭迎到家封羊擊豕罄所有以供之婦

女皆出羅拜故于諸府獨號安靜

景東

明太祖洪武十五年置景東府以土官俄陶知府事

十八年百夷思倫發叛率衆十餘萬攻景東之北吉  
寨俄陶率衆禦之爲所敗率其民千餘家避于大理  
府之白崖川二十三年沐英討平思倫發復景東地  
因奏景東百夷要衝宜置衛以錦衣衛僉事胡常守  
之俄陶仍舊職二十四年帝以景東爲雲南要害且



多腴田調白崖川軍士屯守二十六年命洱海衛指揮同知賴鎮守景東從沐春請也

明史土司傳曰景東古柘南也漢尚未有其地唐南詔蒙民始置銀生府後爲金齒白蠻所據元中統三年討平之以所部隸威楚萬戶至元中置開南州太祖平雲南景東土官俄陶先歸附故即以爲知府

宣宗宣德五年置孟緬長官司

時景東奏所轄孟緬孟梳地方遐遠屢被外寇侵擾  
乞并孟梳於孟緬授把事姜嵩爲長官隸景東六年  
大侯土知州刀奉漢侵據孟緬地敕黔國公沐晟遣  
官撫諭正統中思任發叛官軍征麓川知府陶瓚從  
征有功嘉靖中者東甸稱亂劫景東府印去土舍陶  
金追斬其頭目奪印歸

熹宗天啟六年景東土官以象陣敗貴州水西叛蠻  
水西安邦彥反率衆二十萬入滇境至馬龍後山去

會城十五里總兵官調景東土舍陶明卿率兵伏路  
左賊分道并至官軍禦之賊拒戰勢甚銳明卿乃以  
象陣從左翼衝出橫擊賊潰追奔十餘里巡撫上功  
推明卿第一

明史土司傳曰景東部皆楚種性淳樸習弩射以  
象戰歷討鐵索米魯那鑑安銓鳳繼祖諸役皆調  
其兵及戰象每調兵二千必自効千餘餉士之費  
未嘗仰給公家土司中最稱恭順其府治東有邦

泰山頗險土官陶姓所世居也

廣南

元世祖至元間立廣南西道宣慰司

廣南宋時名特磨道土酋儂智高之裔居之至是立宣撫司領路城等五州後惟領安寧富二州

明太祖洪武十七年置廣南府

時廣南西道歸附改爲府以土官儂郎金爲同知二十八年命雲南後衛官軍至廣南築城建衛郎金父

貞佑不自安結衆據山寨拒守時伏草莽中劫掠覘  
官軍進退都指揮同知王俊乃分攻各寨自將取貞  
佑又以兵扼間道絕其救援諸寨悉破衆潰貞佑窮  
促就禽械送京師

神宗萬厯七年以土官儂文舉屢立戰功實授同知

先時廣南府土官儂郎舉以從征麓川功陞同知死  
無嗣四門舍目共推儂文舉署事屢立戰功至是實  
授同知子應祖從征三鄉親獲賊首詔賞銀百兩播

州之役徵其兵三千討尋甸叛目皆有功

明史土司傳曰儂氏自文舉藉四門舍目推擁之力得授職後儂氏襲替必因之土官之政出于四門租稅僅取十之一道險多瘴知府不至其地印以臨安指揮一人署之指揮出印封一室入取必有瘟癘死亡萬厯末知府廖鉉者避瘴臨安以印付同知儂仕英子添壽添壽死家奴竊印并經歷司印以逃既而歸印于其族叔儂仕祥時仕英親

弟仕獬例得襲索仕祥印仕祥不與遂獻地與泗  
城土官岑接與連婚構兵滅仕獬家及仕祥死子  
琳以府印送接而經歷司印又爲琳弟瓊所有巡  
撫王懋中調兵往問瓊懼還印於通判周憲接亦  
出府印獻於官時兵方調至境遽遣歸廷議治鉞  
擅離與守巡失撫之罪瓊接已輸服勿問詔可未  
幾儂紹湯兄弟爭襲各糾交趾兵衆焚掠一空

廣西

元世祖至元十二年置廣西路

廣西隋屬牂州後爲東楚烏蠻等部所居唐隸黔州  
後師宗彌勒二部寢盛蒙段皆莫能制憲宗時始內  
屬至是籍二部爲軍置路

明太祖洪武十四年廣西歸附以土官普德署府事

二十四年布政使張統奏維摩雲龍永寧浪渠越順  
等州縣蠻民頑惡不遵政教置兵戍守以控制之成  
化中土知府昂貴有罪革其職安置彌勒州乃置流



官始築土城嘉靖元年設雲南彌勒州十八寨守禦千戶所其部衆好擄掠無紀律至水西烏撒用兵始征調之崇禎間巡按御史傅宗龍由滇入黔招普兵以行時滇中最勦稱沙普兵亦曰昂兵

鎮沅

明成祖永樂三年命升鎮沅州爲府

先是洪武十五年元元江路總管刀平與兄那直歸附授千夫長嗣置鎮沅州以平爲知州至是以從征

八百及從攻石崖者達寨外部有功故有是命以平  
爲知府嘉靖中征安銓調鎮沅兵千人命刀寧息領  
之復調其子刀仁亦率兵千人征那鑑克魚復寨初  
鎮沅印爲那氏所奪至是得印以獻命給之

明史土司傳曰鎮沅古濮洛雜蠻所居元史謂是  
和泥昔樸二蠻也唐南詔蒙氏銀生府地其後金  
齒𪚩蠻據之元時爲威遠蠻棚府屬元江路總管  
永寧

明成祖永樂四年升永寧州爲府

先是永寧州隸北勝府洪武平雲南時屬鶴慶府二十九年改屬瀾滄衛十二月土賊卜百如加劫殺軍民官軍討之其子阿沙遁入革失瓦都寨至是設長官司四曰刺次和曰魯瓦之曰革甸曰香羅隸永寧土知州尋升爲府以土官各吉八合爲知府遣往大西番撫諭蠻衆宣德四年永寧蠻寨矢不刺非糾四川鹽井衛土官馬刺非殺各吉八合官軍撫定之命

卜撒襲知府復為矢不刺非所殺已命卜撒之弟南  
八襲馬刺非又據永寧節卜上下三村逐南八大掠  
夜白尖住促卜瓦諸寨事聞帝命都督同知沐昂勒  
兵諭以禍福并移檄四川行都司下鹽井衛諭馬刺  
非還所據村寨正統二年馬刺非為南人所攻拔烏  
節等寨南入亦言馬刺非殺害詔鎮巡官驗問令各  
歸侵地乃寢

順寧

大侯等附

元文宗天歷元年置順寧府

順寧本蒲蠻地名慶甸宋以前不通中國雖蒙氏段氏不能制元泰定間始內附至是置順寧土府

明太祖洪武十五年順寧歸附以土酋阿悅貢署府事十七年命阿日貢爲順寧知府二十三年土酋猛邱土知府子邱等不輸徵賦自相仇殺大理衛指揮鄭祥征炭化賊移師至甸頭破其寨猛邱降乃還猛邱死把事阿羅等復起兵相攻擊二十九年西平侯沐

春遣鄭祥等分道進討禽阿羅等誅之

明史土司傳曰順寧與大侯接境宣德中大侯土舍奉赦奉學兄弟不相能奉學倚妻父土知府猛廷瑞與兄赦曰構兵巡撫陳用賓檄叅將李先著副使邵以仁勘處以仁襲執廷瑞因請改順寧爲流官先著被檄極言不可討被謗語逮下獄瘐死然廷瑞實無反謀以叅將吳顯忠覘其富誣以助惡索金不應遂讒於巡按張應揚轉告用賓廷瑞

大恐不得已斬奉學以獻顯忠益誣其陰事傳以反狀撫按會奏得旨大剿廷瑞出獻印獻子以候命不從顯忠帥兵入其寨盡取猛氏十八代蓄貲數百萬誘廷瑞至會城執之獻捷於朝於是所部十三寨盡憤始聚兵反官兵悉剿除之并殺其子以仁超擢右都御史蔭子未幾坐大辟繫獄應揚亦病卒人以爲天道云

又曰順寧附境有猛猛撒猛絢所爲三緬也猛

猛最强部萬人時與二猛爲難其地田少箐多射獵爲業猛緬地雖廣而人柔弱部長最忠順猛撒微弱後折入於耿馬

蒙化

元世祖至元十四年置蒙化路

蒙化唐屬姚州蒙氏時緬奴邏築城居之號蒙舍詔段氏改開南縣元憲宗七年置蒙舍千戶隸大理至是改爲蒙化路二十年降爲州



明太祖洪武十七年以土酋左禾等爲蒙化州判等官  
二十三年西平侯沐英以蒙化所屬蠻火頭字青等  
梗化不服請置衛賊高天惠作亂大理衛指揮使鄭  
祥捕斬之傳首雲南永樂時土知州左伽從征麓川  
戰大侯功第一進秩臨安知府掌州事正統中升州  
爲府以伽爲知府世襲

明史土司傳曰蒙化所部江內諸蠻性柔頗馴擾  
江外數枝以勇悍稱每應征調多野戰無行伍

又曰萬厯四十八年雲龍土知州段龍死子嘉龍  
立養子進忠殺嘉龍爭襲流劫殺掠官軍進討進  
忠從間道欲趨大理官軍禽誅之改設流官授段  
氏世吏目一人

孟艮

明成祖永樂三年設孟艮府

孟艮蠻名孟捐自古不通中國至是來歸乃設府以  
土酋刀哀爲知府至正統間孟艮地多爲木邦所并

景泰中入貢知府名慶馬辣不知於刀氏何屬也

明史土司傳曰孟艮在姚關東南二千里外沃野  
千里最殷富地多虎農者於樹杪結草樓以獲稼  
雲南知府趙混一嘗入其境待之禮慢後無復至  
者

### 孟定

元世祖至元中立孟定路

孟定蠻名景麻至是立孟定路軍民總管府領二甸

隸大理金齒等處宣慰司

明太祖洪武三十五年設孟定府

時土酋來朝改爲府以刀渾立爲知府初孟璉與孟定皆麓川地其土目皆故等夷惡相屬後改孟璉隸雲南多以互侵土地仇殺宣德六年土知府罕顏法以爲言敕黔國公沐晟遣官撫諭俾各歸侵掠正統中麓川叛孟定知府刀祿孟遁走木邦土官罕葛從征有功總督王驥奏令食孟定之土嘉靖間木邦罕

烈據地奪印令土舍罕慶守之名爲耿馬地之所入  
悉歸木邦萬歷十二年官兵取隴川平孟定故地以  
罕葛之後爲知府十五年頒孟定府印崇禎末孟定  
叛降於緬甸

明史土司傳曰其地自姚關南八日程西接隴川  
東連孟連木邦北鎮康土瘠人稀有馬援城在馬  
領安撫司一曰耿馬萬歷十二年置以們罕爲安  
撫使與孟定隔喳哩江孟定居南耿馬居北罕死

弟們罕金獲印時木邦思禮作亂侵灣甸鎮康倚  
罕金爲聲援天啟二年緬人攻猛乃孟艮罕金欲  
殺之緬移兵攻金金厚賂之乃解後與木邦罕正  
構難不絕云

曲靖

元世祖至元十三年置曲靖路

曲靖隋恭協二州地唐置南寧州改恭州爲曲州分  
歸州置靖州至元初置磨彌部後改爲曲靖路

明太祖洪武十五年置曲靖軍民府

先是十四年征南將軍下雲南元曲靖宣慰司張麟等降至是改路爲府

二十年越州土酋叛命官軍討之

先是十七年亦佐縣土酋安伯作亂西平侯沐英討降之至是越州土酋阿資與羅雄州營長發東等叛

阿資者土官龍海子也越州蠻呼爲苦麻郎元末龍海居之所屬俱羅羅斯種王師征南時吳駐兵其地之湯池山龍海降詔以龍海爲知州尋爲亂英禽之徙還東至益州病死阿資雖其讎益桀驁至是叛

帝命英會征南將軍傅友德進討道過平夷以其山  
險惡宜駐兵屯守遂遷其山民往居卑午村留神策  
衛千戶劉成等將千人置堡其地後以爲平夷千戶  
所阿資等率衆寇普安燒府治大肆剽掠友德率兵  
擊之斬其營長二十二年阿資退屯普安倚崖壁爲  
寨友德以精兵蹙之蠻衆皆緣壁攀崖墜死不可勝  
數生禽一千三百餘人獲馬畜甚衆阿資遁還越州  
復追擊之斬其黨五十餘人阿資窮蹙請降



二十四年徙越州衛於陸涼州

初阿資之遁也揚言曰國家有萬軍之勇我地有萬山之險豈能盡滅我輩英乃請置越州馬龍二衛扼其險要復分兵追捕遂降英等以陸涼西南要地請設衛屯守命於吉魯昌築城置陸涼衛又以平夷尤當要衝四面皆蠻部落乃遣開國公常昇往辰陽集民間丁壯五千人即平夷千戶所改置衛二十三年置越州衛至是以英言雲南諸蠻皆降惟阿資恃險

屢叛宜徙衛軍守禦乃徙越州衛于陸涼已阿資復叛命率師進討屢敗賊衆會連月淫雨水溢阿資援絕與其衆降西南有木容籌賊常出沒處調普安衛官軍置寧越堡鎮之然阿資終不悛二十七年阿資復反平西侯沐春等營於越州城北遣壯士伏於岐路而以兵挑戰蠻兵悉衆出伏起大敗之阿資脫身遁春星列守堡絕其糧道賊益困二十八年引兵擣賊巢禽阿資斬之俘其黨越州乃平自是以後西南

晏然

神宗萬曆九年羅雄土酋反

先是嘉靖中羅雄知州者濬殺營長奪其妻生子繼  
榮稍長即持刀逐濬濬欲置之死以其母故不忍及  
濬請老以繼榮代襲繼榮遂逐濬濬訴之鎮巡官命  
迎濬歸繼榮陽事之實加禁錮至是調羅雄兵征緬  
繼榮將行恐留濬爲難遂弑濬時霑益土知州安世  
鼎死妻安素儀署州事亦提兵赴調繼榮與之合營

通焉且倚霑益兵力爲助師過越州留土官資氏家  
淫樂不進知州越應奎白於兵備將禽之繼榮走遂  
聚衆反攻破陸涼鴨子塘陡陂諸寨築石城於赤龍  
山據龍潭爲險廣六十里名已所居曰龍樓鳳閣環  
以羣寨實諸軍士妻女其中十三年巡撫劉世曾乃  
檄諸道進兵適劉綎破緬解官回世曾以兵屬綎  
遂馳赴普鮎營直擣赤龍寨斬賊渠帥繼榮遁去綎  
復連破三寨降其衆一萬七千人追奔至阿拜江斬

繼榮賊平世曾請築城改設流官乃以何俛爲知州  
者繼仁爲巡檢未幾蠻寇必大反殺繼仁執俛叅將  
蔡兆吉等討定之乃改羅雄州曰羅平設千戶所曰  
定雄

時雷益安素儀無子以爲機土官子安紹慶爲  
副慶死孫安遠襲土婦設科作亂逐安遠歸衆

焚掠雷益諸堡站陷平夷天啟三年官兵禽設科  
誅之五年安遠據雷益從水西叛事詳烏撒傳中

熹宗天啟初年移平夷右所於交水

初越州阿資罪誅永樂間以其子祿寧爲土縣丞與  
亦佐沙分土而居其地南北一百二十里士馬精

強征調銀至三千八百兩曲靖境內有交水去平夷  
衛二舍與點接壤滇師出上六衛必由之道至是水  
西用兵撫臣議曲靖鎖鑰全滇交水當點滇之衝乃  
扼塞要地平夷右所宜移置交水去險築城俾與平  
夷衛相望互為聲援便報可

姚安

元文宗天曆時升姚州為姚安路

姚安本漢弄棟青蛉二縣地唐置姚州都督府

以民多姚

姓也

天寶間南詔蒙氏改為弄棟府宋時段氏改姚州  
先是憲宗三年姚州內附七年置統矢大姚堡二千  
戶所至元十二年罷統矢千戶置姚州罷大姚千戶  
置大姚縣至是升為路

明太祖洪武十五年改姚安路為府

明年姚安土官自久作亂官兵往討師次九十九莊  
自久遁去十七年復寇品甸土官高保等從西平侯  
沐英討平之宏治中土官高棟與普安叛賊戰死於

板橋驛嘉靖三十年土官高鵠當元江之變布政司  
徐樾遇害奮身赴救死之萬歷中同知高金以征緬  
功賜四品服

明史姚安土司傳曰所屬大姚縣有鐵索箐者本  
獠種依山險以剽掠為業旁郡皆受其害宏治間  
稍有歸命者分隸於姚安姚州嘉靖中乃專屬姚  
安其渠羅思者有幻術造偽印稱亂萬歷元年巡  
撫鄒應龍與總兵官沐昌祚討平之諸郡乃安



鶴慶

元世祖至元二十三年升鶴州為鶴慶路

鶴慶唐時名鶴川南詔置謀統郡先是憲宗三年置  
鶴州七年立千戶三仍稱謀統又置義督千戶至元  
十一年罷謀統為鶴州改義督為劍川縣至是升為  
路

明太祖洪武十七年以土酋董賜等為鶴慶知府等官  
先是大軍平雲南分兵拔三營萬戶砦獲偽叅政寶

山帖木兒等置鶴慶府以土官高隆署府事至是以  
賜為知府高仲為同知賜子節為安寧知州楊奴為  
劍川知州賜率其屬來朝明年以賜為雲南前衛世

襲指揮僉事

賜安寧州人世為酋長大軍入滇率衆  
來降復從軍討賊有功故與子節並有

世襲知府知州之命及賜來朝乞還父子所授官而  
自為安寧知州時議以賜既有功不可聽其辭而弗  
之官則可免乃諭以雲南前  
衛密迤安寧特改指揮僉事二十年楊奴叛官軍討

之楊奴遁未幾還劍川復聚蠻為亂大理衛指揮鄭  
祥復以兵擊斬之

英宗正統八年鶴慶改設流官

先是二年鶴慶土知府高倫與弟純屢逞兇惡屠戮士庶與母楊氏並叔宣互相賊害敕黔國公沐昂諭使輸款如恃強不服即調兵擒捕五年土知府高倫妻劉氏同倫弟高昌等糾集囉囉麼些人衆肆行兇暴事發不從逮訊敕昂即委官勘實量調官軍擒捕首惡并逮千戶王蕙及高宣等至京質問八年鶴慶民楊仕潔妻阿夜珠告倫謀殺其子大理衛千戶復

奏報倫擅率軍馬欲謀害親母又稱其母告倫不孝及私斂民財多造兵器殺戮軍民支解梟令等罪黜國公沐晟等勘奏言倫所犯皆實罪應死倫復屢訴因與叔宣爭襲又與千戶王蕙爭娶妾以致挾仇誣陷所勘殺死皆病死及強盜拒捕之人倫母亦訴倫實由宣等陷害復敕晟及御史嚴恭確訪既而奏當倫等皆伏誅高氏族人無可繼者帝命於派官中擇人以綏遠蠻乃擢瀘州知府林邁節為知府鶴慶之

改流官自此始

武定

元世祖至元十一年改羅婺部為武定路

武定南詔三十七部之一宋淳熙間大理段氏以阿  
厯為羅武部長三傳至矣格先是為北部土官總管  
至是改為路置南甸縣

明太祖洪武十四年武定女土官商勝首先歸附

明年改路為府以勝署府事十六年遣人來朝正德

二年七月廢南甸縣改隸和曲州石舊縣改隸祿勸  
州至嘉靖七年土舍鳳朝文殺同知以下官吏劫州  
印舉兵與尋甸賊安銓合犯雲南府時安銓未平朝  
文復起滇中大擾五月黔國公沐勳疏言會同巡撫  
等調發官軍於二月進兵擊斬強賊十餘人賊奔回  
武定乞敕部授臣方畧俾獲便宜行事并各土舍凡  
有功者俱許承襲以作其敵愾之氣帝納之賊既敗  
歸其黨稍散初朝文結其衆謂武定知府鳳詔母子

已戮朝廷且盡剿武定蠻衆至是鳳詔同其母率衆  
自會城往蠻民相顧錯愕咸投鳳詔降朝文計無所  
出絕普渡而走官兵追敗之朝文率家奴數人取道  
霑益州奔至東川湯郎箐為追兵所及磔死銓衆猶  
盛遁據尋甸故巢列寨數十官兵分哨夾攻之諸寨  
先後破乃併力攻拔其必古老巢銓奔東川入芒部  
為土舍祿慶所執捷聞銓朝文皆梟示籍其產家屬  
戍邊

十六年命土知府瞿氏掌武定府印

初府印自洪武以來俱掌於土官正德間有司議以  
畀流官同知土知府職專巡捕徵糧而已及鳳詔死  
瞿氏以母襲子官所屬四十七馬頭阿台等數請以  
印屬瞿氏吏部覆係舊例從之四十二年瞿氏老舉  
鳳詔妻索林自代比索林襲遂失事姑禮瞿氏大恚  
乃收異姓兒繼祖入鳳氏宗挾其甥婿貴州水西土  
舍安國亨四川建昌土官鳳氏兵力欲廢索林以繼



祖嗣不克乃具疏自稱為索林囚禁令繼祖詣闕告  
之繼祖歸詐稱受朝命襲職驅目兵逼奪府印索林  
把印奔會城撫按官諭解之索林歸武定視事如故  
而復聽繼祖留瞿氏所於是婦姑嫌隙益甚索林謀  
誅繼祖事洩繼祖遂大發兵圍府行刼和曲祿勸等  
州縣殺傷調至土官王一心等兵索林復把印走雲  
南巡撫曹忭下令收印逮其左右鄭垓繫獄令瞿氏  
暫理府事貸繼祖責其自新

四十五年築武定新城成

時巡撫呂光洵遣鄭竣回府復業

鄭竣者前為索林謀殺繼祖者也

繼祖執而殺之糾衆攻新城臨安通判胡文顯督百

戶李鰲土舍王德隆往援至雞溪子隘遇伏鰲及德

隆俱死僉事張澤督尋甸兵二千餘馳救亦敗澤及

千戶劉裕被執鎮巡官促諸道兵並進逼繼祖東山

寨圍之繼祖懼攜澤及索林走照姑已復殺澤官軍

追之急由直勒渡過江趨四川依東川婦家阿科等

巡按劉思問以狀聞敕雲南四川會兵討賊初繼祖  
之走東川也土官鳳氏與之通已而見滇蜀官軍與  
土舍祿紹先等兵皆會乃背繼祖發卒七千人來援  
繼祖益窮賊帥者色赴紹先營降斬繼祖以獻姚縣  
土官高繼先復禽其餘黨姚安府同知高欽及弟鈞  
謀主趙士傑等皆伏誅

神宗萬曆三十五年武定置流官

先是繼祖餘黨伏誅守臣議改設流官猶不欲絕鳳

氏授索林支屬鳳歷子思堯經歷給莊百餘鳳歷以  
不得知府怨望陰結四川七州及水西宣慰安國亨  
謀作亂流官知府劉宗寅遣諭之不聽遂聚衆稱思  
堯知府夜襲府城城中嚴備不能入退屯魯墟宗寅  
夜出兵斫其營賊潰追至馬刺山禽鳳歷伏誅至是  
繼祖姪阿克久徙金沙江外賊黨鄭舉等誘阿克作  
亂陰結江外會川諸蠻直陷武定大肆劫掠連破元  
謀羅次諸城索府印鎮撫以兵未集懼差人以府印

授之賊入武定立阿克為知府鎮撫調集土兵分五  
路進剿克復武定元謀羅次祿豐嵩明等州縣禽阿  
克及其黨至京師磔於市武定平遂悉置流官

### 尋甸

明太祖洪武十五年命改尋甸為軍民府

尋甸古滇國地僕刺蠻居之號仲剗濫源部後為烏  
蠻裔斯丁所奪號斯丁部蒙氏為尋甸至段氏改仁  
德部元初置仁德萬戶後改府至是太祖定雲南乃

有是命十七年以尋甸土官沙琛為知府二十三年  
置木密關守禦千戶所於尋甸之甸頭易龍驛又置  
屯田所於甸頭里果馬里聯絡耕種以為邊備

臣等謹按雲南通志晉為烏蠻之裔新丁所奪號  
新丁部謫為仁地唐蒙氏宋段氏皆為仁地部烏  
蠻居之元初置仁地為萬戶府領為美歸厚二縣  
與此稱新丁為斯丁仁地為仁德有異錄以備考  
憲宗成化十四年尋甸改置流官

先是十二年土官舍人安宣聚衆殺掠命鎮守官相機撫捕至是土知府安晟死兄弟爭襲遂改置流官明史尋甸土司傳曰嘉靖六年安銓作亂乃土舍之失職者侵掠嵩明木密楊林等處巡撫傳習檄守巡官討之大敗賊遂陷尋甸嵩明流官知府馬性魯棄城走時武定鳳朝文叛銓與之合久之伏誅事詳前傳

麗江

元世祖至元八年置麗江路

麗江南詔蒙氏置麗水節度宋時麼些蠻蒙厓據之  
段氏不能制元憲宗四年討平之立茶罕章宣慰司  
至是改麗江路

明太祖洪武十五年置麗江府

十六年以蠻長木德為知府羅克為蘭州知州十八  
年巨津土酋阿奴聰叛刼石門關官軍捕獲誅之時  
木德從征又從西平侯沐英征景東定邊皆有功予



世襲二十四年木德死子初當襲初守巨津州石關  
與西番接境既襲職英請以初弟為千夫長代守石  
門從之宣德五年麗江府奏滄浪江寨蠻者保等聚  
衆劫掠蘭州土官羅牙等奏者保拒命請發兵討之  
帝命黔國公及雲南三司相機行勿緣細故激變蠻  
民成化十一年知府木嶺奏鶴慶千夫長趙賢屢糾  
羣賊越境殺掠乞調旁衛官軍禽勦命移知守臣計  
畫萬厯三十一年巡按宋興祖奏稅使內監楊榮欲

責麗江土官退地聽採竊以麗江自太祖令木氏世  
官守石門以絕西域守鐵橋以斷吐蕃滇南藉為屏  
藩今使退地聽採必失遠蠻之心即令聽諭已使國  
家歲歲有吐蕃之防倘或不聽豈獨有傷國體疏上  
事得寢

明史麗江土司傳曰雲南諸土官知詩書好禮守  
義以麗江木氏為首

元江

元世祖至元二十五年置元江路

元江古西南夷極邊境曰惠龍甸又名因遠部南詔蒙氏以屬銀生節度徙白蠻蘇張周段等十姓戍之又開威遠等處置威遠賧後和泥侵據其地宋時儂智高之黨竄居於此和泥又開羅槃甸居之後爲麼些徒蠻阿贊諸部所據元憲宗時內附復叛至是討平之於威遠更置元江路領羅槃馬籠等十二部屬臨安廣西元江等處宣慰司

明太祖洪武十五年改元江路為府

明年以土官那直為知府十八年置因遠羅必甸長官司隸之以土酋白文玉為副長官二十年遣經歷楊大用徃元江等府練兵時百夷即麓川思倫發屢為邊患欲發兵平之故也

世宗嘉靖二十五年元江土舍那鑑作亂命官軍剿之鑑殺其姪土知府那憲奪其印并收因遠驛印記命鎮巡官發兵進剿二十九年那鑑懼密約交蠻武文

淵謀亂益縱兵攻掠村寨總兵官沐朝弼與巡撫石  
簡調武定北勝亦佐等土漢兵五哨分部進兵破木  
龍寨降甘莊賊勢漸蹙那鑑遣經歷張維及生儒數  
人詣南羨監督王養浩所乞降時布政徐樾以督餉  
至南羨聞維言謂鑑誠計窮乃約翼日令鑑面縛出  
城來降如期親率百人往城下受降鑑縱象馬夷兵  
突出衝之樾及左右皆死事聞帝降敕切責簡等尅  
期捕賊贖罪朝弼與簡乃督集五哨兵環元江而壁

今南羨哨督兵渡江攻城選路通哨甘莊哨各精卒  
二千佐之那鑑知二哨精卒悉歸南羨潛遣兵象乘  
虛衝路通哨官兵不意賊至倉猝燒營走監督郝維  
嶽奔入甘莊哨甘莊亦大潰督哨李維亦遁惟餘南  
羨逼城而軍武定女土官瞿氏寧州土舍祿紹先廣  
南儂兵頭目陸友仁咸恨那鑑戕主奪嫡誓死不退  
督哨王養浩因激獎之翼日鼓譟攻城賊大敗閉門  
不出官兵圍之鑑乞降官兵懲徐樾之敗不應時瘴

毒起大兵乃復撤期秋末征之朝弼以事聞帝定二  
哨失事諸臣罪行撫臣厚賞瞿氏祿紹先陸友仁等  
敕朝弼會同新撫臣鮑象賢鳩兵討賊三十二年象  
賢至鎮調集土漢兵七萬人廣集糧運尅期分哨進  
剿元江為必取計那鑑懼伏藥死象賢撫諭其衆禽  
其賊首及戕土官那憲之阿捉殺布政徐樾之光龍  
光色等皆斬首鑑子恕輸所占那旂封鑾等村寨并  
出所掠鎮沅府印納象十二隻輸屢歲逋賦象賢命

官民推那氏當立者衆舉前土官那端從孫從仁象賢疏言其狀請廢恕貸其死命從仁暫統其衆

永昌

元世祖至元十一年置永昌州

永昌古哀牢國漢武帝時置不韋縣東漢置瀾滄郡尋改永郡唐屬姚州後為南詔蒙氏所據歷段氏高氏皆為永昌府至是置為州尋改府隸大理路置金齒等處宣撫司治



明太祖洪武十六年永昌州土官申保來朝尋以為府同知

先是定雲南立金齒衛以元雲南右丞觀音保為指揮使賜姓名李觀二十年遣使諭金齒衛指揮儲傑嚴武李光曰金齒遠在邊徼土民不遵禮法爾指揮李觀處事寬厚為諸蠻所愛然其下多恃功放恣有乖軍律故特命傑武輔之觀之寬可以綏遠武之嚴可以馭下其整練諸軍以觀外變二十三年西平侯

沐英言永昌居民鮮少宜以府衛合為軍民使司從之嘉靖元年復設永昌軍民府領州一縣二其長官司二曰施甸曰鳳谿

宣宗宣德三年置騰衝土知州

時騰衝土官張銘言其地遠在極邊麓川宣慰思任發不時侵擾乞設州治從之即以銘為騰衝知州八年置騰衝州庫扛關庫刀關庫勒關古湧二關先是騰衝州奏本州路通麓川緬甸諸處人民逃徙者多

有誤差發貢獻舊四百夫長隸騰衝千戶所其庫扛  
闕等五處皆軍民兼守今四百夫已隸本州止州民  
守之乞於五處置巡檢司以土軍尹黑張保李輔郭  
節等為巡檢正統二年以非額革之

### 新化

元世祖至元間以馬龍等并入他郎甸

新化本馬龍他郎二甸阿楚諸部蠻據之先是憲宗  
時內附隸寧州至是以馬龍等甸并於他郎甸隸元

江路

明太祖洪武十七年以新化州土酋普賜為馬龍他郎  
甸副長官

初改名馬龍他郎甸長官司後又改升為新化州宣  
德八年八月黔國公沐晟奏摩沙勒寨萬夫長刀甕  
及弟刀眷糾蠻兵侵占馬龍他郎甸長官司衙門殺  
掠人民帝命遣人撫諭但得刀甕毋擾平民正統二  
年晟等奏甕不服招撫請調附近官土兵剿捕帝以

蠻衆仇殺乃其本性可仍撫諭之事遂不竟

明史土司傳曰其地有馬龍諸山居摩沙勒江右  
兩岸束隘如峽地勢極險

### 威遠

元世祖至元中置威遠州

威遠唐南詔銀生府地舊為濮落雜蠻所居大理時  
為百夷所據至是置為州

明太祖洪武三十五年命土官刀莫黨為威遠知州

先是平雲南後改威遠蠻棚府為威遠州至是復有  
是命永樂二年募蠻為車里所擄奪其地命西平侯  
諭之乃是募蠻并侵地宣德八年威遠州奏其地與  
車里接境累被各土官劫掠播孟賓當要衝乞置巡  
檢司以把事劉裕為巡檢從之正統六年麓川叛寇  
思任發侵其境脅從土知州刀蓋之母招曩猛悉  
出金貨分賄頭目母子躬擐甲胄賈勇殺賊斬其酋  
餘罕之遂餘賊過江湖死數千斬首數百得其戰艦

戰象仍留兵守賊所據江口捷聞勅獎忠義特進秩  
加封賜以銀幣并及酋長等時西南諸部多相仇殺  
所給牌符燒燬不存景泰六年蓋等來朝復給之

明史土司傳曰其俗勇健男女走險如飛境內有  
河汲水練炭上即成鹽無秤斗以簍計多寡量之

### 北勝

元世祖至元中改北勝州為府

北勝唐貞元中南詔異牟尋始開其地名北方賧徙

瀾河白蠻及羅落麼些諸蠻以實其地號成倡賧又  
改名善巨郡宋時大理段氏改為成紀鎮元初內附  
至是置施州尋改北勝州後為府隸麗江路

明太祖洪武十五年改北勝府為州

時隸鶴慶府後屬瀾滄衛至正統七年北勝州設流  
官吏目以州蠻苦於瀾滄衛官軍侵漁也萬歷四十  
八年北勝州土同知高世懋死異母弟世昌襲其族  
姪蘭妄稱世昌奸生訟之官不聽世昌懼逼走麗江



避之尋還至瀾滄宿舍蘭圃而縱火殺其家七十餘人發其祖父墓自稱欽授把總大掠麗江知府木增請討之謂法紀弁髦尾大不掉不治將有隱憂上官嘉其義調增率其部進剿獲蘭梟之

灣甸

元世祖中統初以灣甸內附屬鎮康路

灣甸蠻名細賧地多瘴有黑泉漲時飛鳥過之輒墮

明太祖洪武十七年置灣甸縣

永樂元年以西平侯沐晟奏其地近麓川地廣人稠  
設長官司尋改為州以土官刀景發為知州并置流  
官吏目一員宣德八年以土官刀景項弟景辦法繼  
兄職州有流官鄰木邦順寧日以侵削萬歷十一年  
土官景宗真率弟宗材黨木邦叛賊罕虔入寇姚關  
宗真死於陣禽宗材斬之景真子幼貸死降為州判  
官後從討猛廷瑞有功復舊職

鎮康

元順帝至元十三年立鎮康路領三甸

鎮康蠻名石賧本黑焚所居先是中統初內附至是立為路

明太祖洪武十五年改鎮康路為府

十七年改為州永樂七年以灣甸同知曩光為知州  
初鎮康地隸灣甸曩光請增設署所故有是命其後亦為順寧木邦所侵削

大侯

臣等謹按一統志大侯即今之雲州屬順寧府此

猶仍明史之舊名耳

元世祖中統初以大侯屬麓川路

大侯蠻名孟祐白夷所居時以內附授大侯長官司  
隸麓川

明太祖洪武二十四年仍置大侯長官司

至宣德四年升長官司為州以土官刀奉罕為知州  
時奉罕奏灣甸鎮康二長官永樂中俱升為州乞援  
二州例帝增秩旌之故有是命正統三年土官刀奉

漢奏欲與木邦宣慰罕門法共起土兵十萬協同征  
剿麓川賜金牌信符并降敕嘉獎七年以奉漢子奉  
送能率土兵助討麓川勅襲大侯知州至萬歷中土  
目爭殺抗命既討平之改為雲州設流官

瀾滄

明太祖洪武二十八年置瀾滄衛

瀾滄元為北勝州地至是置衛明年於州南築城領  
北勝浪渠永寧三州福建布政李韶以前任雲南叅

議知土俗事宜疏言瀾滄衛與北勝州同一城地域  
廣遠與四川建昌西番野番相通又姚安府大羅衛  
賓川州地方有賊穴六七軍民受害請添設兵備副  
使於瀾滄衛城以姚安大羅賓川鶴麗大理洱海景  
東諸府州衛所皆令屬之於野番則用撫流民法於  
賊巢則用立保甲法朝夕經理則內外寇患皆可弭  
矣因從其議

麓川

龍川附

明太祖洪武十七年命平緬宣慰使司思倫發兼統麓川之地

麓川與平緬連境元時皆屬緬甸古朱波地也宋寧宗時緬甸波斯等國進白象緬甸之名自此始在雲南之西南與八百國占城相接先是元分置兩路以統其所部洪武十五年大兵下雲南進取大理下金齒平緬與金齒壤地相接土蠻思倫發聞之懼遂降因置平緬宣慰使司即以思倫發為之至是以其遣

使來貢又改爲麓川平緬宣慰使司命蕪統之

臣等謹按思倫發之子名思行發思行發之弟名

思任發子名思機發今以雲南通志考之但稱思  
倫思行等而不稱發字正統三年十二月思任屠  
騰衝據潞江仍自稱曰法法滇王號則發字當作  
法彼僭稱也

三十一年思倫發寇定邊西平侯沐英帥師大敗之

先是十八年率衆寇景東是年正月又誘羣蠻入寇



馬龍他郎甸之摩沙勒寨英遣官兵擊破之倫發悉  
舉其衆號三十萬象百餘寇定邊欲報摩沙勒之役  
新附諸蠻皆為盡力英選師三萬亟趨至列弩注射  
突陣大呼象多傷蠻亦多中矢斃次日益置火鎗神  
機箭更番射象奔賊大敗擣其寨斬首三萬餘級降  
卒萬餘人象死者半生獲三十有七倫發遁以捷聞  
帝遣使諭英移師逼景東屯田固壘以待大軍集勿  
輕受其降明年倫發聽命謝罪并獻叛首刀廝郎等

平緬遂平

三十年倫發部長刀轄孟叛官軍禽之

先是二十八年緬國王使來言百夷屢以兵侵奪其境明年緬使復來訴帝遣使至緬國及百夷倫發聞

詔俯伏謝罪願罷兵是年刀轄孟叛

初緬俗不好佛有僧至自雲南

善為因果報應之說倫發信之又自金齒戍卒逃入其境能為火銃大炮之具倫發喜其技能俾繫金幣與僧住諸部長工刀餘

孟等不服遂與其屬叛

攻騰衝倫發率其家走雲南

西平侯沐春遣人送至京師帝命春率雲南四川兵

討之并遣倫發歸駐潞江上招諭其部衆三十一年  
官軍禽刀韃孟倫發始還平緬踰年卒

成祖永樂十一年思行發請以其弟思任發代職從之  
二十年遣使來謝侵南甸州罪帝遣中官雲仙勅戒  
之宣德四年麓川木邦爭界各訴於朝遣使諭解之  
俾安分毋侵越黔國公沐晟奏麓川所屬思陀甸火  
頭曲比為亂帝命姑撫之三年雲南三司奏麓川宣  
慰使思任發奪南甸州地請發兵問罪晟以任發侵

奪南甸騰衝之罪不可宥請發官兵五萬及諸土兵討之帝以交趾四川方用兵民勞未息宜再行招諭不得已其調雲南土官軍及木邦宣慰諸蠻兵剿之八年遣雲仙齋勅至麓川賜任發幣物諭其勿與木邦爭地抗殺

明史土司傳曰初洪武間克平雲南惟百夷部長思倫發未服後為頭目刀榦孟所逐赴京陳訴命為宣慰回居麓川分其地設孟養木邦孟定三府

隸雲南設潞江干崖大侯灣甸四長官司隸金齒  
永樂九年升孟養木邦為宣慰司孟養宣慰刀木  
旦與鄰境仇殺而死緬甸乘機并其地未幾緬甸  
宣慰新斯加又為木邦宣慰所殺時倫發已死子  
行發襲亦死次子任發襲為麓川宣慰狡獪甚於  
父兄差發金銀不以時納朝廷稍優客之會緬甸  
之危任發侵有其地遂欲盡復故地稱兵擾邊侵  
孟定府及灣甸等州殺掠人民而南甸知州刀貢

罕亦奏麓川奪其所轄羅卜思莊等二百七十八  
村於是屢奏思任發連年累侵孟定南甸干崖騰  
衝潞江金齒等處自立頭目刀珍罕土官早亨等  
相助為暴叛形已著近又侵及金齒勢甚猖獗已  
遣諸衛馬步官軍至金齒守禦乞調大兵進討朝  
命遣將廷臣舉右都督方政都督僉事張榮往雲  
南協同鎮守右都督昂率兵計之任發方修貢冀  
緩師而嚴邊信其降無渡江意任發乃遣衆萬餘

奪潞江沿江造船三百艘欲取雲龍又殺死甸順  
江東等處軍餘殆盡帝以賊勢日盛責晟等玩寇  
養患政亦至軍欲出戰晟不可政造舟欲濟師晟  
又不許政不勝憤乃獨率麾下與賊將緬簡戰破  
賊舊大寨賊奔景罕指揮唐清復擊破之又追至  
高黎共山共斬三千餘級乘勝深入逼任發上江  
上江賊重地也政遠攻疲甚求援於晟晟怒其違  
節制渡江不遣久之以兵少往至夾象石又不進

政追至空泥知晟不救賊出象陣衝擊軍殲政死  
馬晟聞敗乃請益軍帝遣使者責狀仍調湖廣官  
軍三萬一千五百人貴州一萬人四川八千五百  
人令吳亮馬翔統之至雲南聽晟節制仍勅晟預  
籌糧糈而晟懼罪暴卒

英宗正統六年命大會諸道兵討麓川

先是思任發犯景東剽孟定殺大侯知州乃奉漢集  
千餘人破孟賴詣寨孟連長官司諸處皆降之任發



乃遣人以象馬金銀來修貢復致番書於雲南總兵  
官謂始因潞江安撫司線舊法相邀報讐其後線舊  
法乃誣已為入寇致大軍壓境惶恐無地今欲遣使  
謝罪乞為導奏帝降敕許赦其罪時刑部侍郎何文  
淵疏請罷麓川師命下廷臣議於是行在兵部尚書  
王驥及英國公張輔等皆以為麓川負恩怙惡在所  
必誅須更選將練兵以昭天討如思任發早自悔禍  
縛詣軍門生全之恩取自上裁帝然之至是以定西

伯蔣貴為平蠻將軍都督李安劉聚副之以兵部尚書王驥總督雲南軍務大會諸道兵十五萬討之

十二月官軍進攻麓川以捷聞

時思任發遣賊將刀令道等十二人率衆三萬餘象八十隻抵大侯州欲奔景東威遠而驥將抵金齒任發遣人乞降驥受之密令諸將分道入右叅將冉保從東路攻細甸灣甸水寨入鎮康超孟定驥與貴由中路至上江會騰衝左叅將宮聚自下江據夾象石

至期合攻之賊拒守嚴銳弩飛石交下如雨次日乘風焚其柵火竟夜不息官軍力戰拔上江寨斬刀放戛父子禽刀孟頊前後斬馘五萬餘

七年復命官軍征麓川

思任發敗走緬大軍還復出為寇仍命驥等往征驥率兵渡下江由南甸至羅卜思莊前軍抵於木籠時任發率衆二萬餘據高山立硬寨連環七營首尾相應驥遣官聚劉聚分左右翼緣嶺上驥將中軍橫擊

之賊遁軍進馬鞍山擣賊寨寨西面拒江壁立週迴  
三十里皆立柵開墾軍不可進而賊從間道潛師出  
馬鞍山後驥戒中軍毋動命指揮方瑛率精騎六千  
突入賊寨斬首數百級復誘敗其象陣而從東路者  
合木邦人馬招降孟通諸寨元江同知杜凱等亦率  
車里及大侯蠻兵五萬招降孟璉長官司并攻破烏  
木弄憂邦等寨斬首二千三百餘級齊集麓川守西  
峨渡就通木邦信息百道環攻復縱火焚其營賊死

不可勝算任發父子三人并挈妻孥數人從間道渡江奔孟養搜獲原給虎符金牌信符宣慰司印及所掠騰衝千戶等印三十二麓川平捷聞命還師時任發敗走孟蒙復為木邦宣慰所擊追過金沙江走孟廣緬甸宣慰卜刺當亦起兵攻之帝命木邦緬甸能効命禽任發獻者即以麓川地與之未幾任發為緬人禽緬人挾之求地其子思機發窺大兵歸圖恢復據麓川出兵侵擾於是復命王驥蔣貴等統大軍再

征麓川驥率師至金齒機發遣頭目刀龍肘偕其子  
詣軍門求降驥遣人至緬甸索任發緬佯諾不遣驥  
至騰衝與蔣貴沐昂分五營進乃宣言犒師而命貴  
潛焚其舟數百艘進師薄之緬甸堅執前詔必予地  
乃止任發復說以機發致仇為解驥乃趨者藍搗機  
發巢破之機發脫走俘其妻子部衆立隴川宣慰司  
而歸時機發竊據孟養負固不服自如也十一年緬  
甸始以任發及其妻孥三十二人獻至雲南任發於

道中不食垂死千戶王政斬之函首京師其子機發  
屢乞降詞甚哀帝因勅總兵官沐斌及叅贊軍務侍  
郎楊寧等以朝廷既貸恩機發以不死經畫善後長  
策以聞

十三年復議征麓川

先是十二年總兵官黔國公沐斌奏緬甸以機發掠  
其牛馬金銀欲進兵攻取臣等議遣人分諭木邦緬  
甸諸宣慰司令集蠻兵剋期過江分道進討臣等率

官軍萬人駐騰衝以助其勢賊四面受敵必成禽矣  
從之及沐斌等至騰衝督諸軍追捕機發終不出潛  
匿孟養斌以春瘴作江漲不可渡糧亦乏引兵還帝  
以斌師出無功復命兵部尚書靖遠伯王驥總督南  
京雲南湖廣四川貴州官軍土軍十三萬人往討之  
至是驥凡三征麓川矣

十四年大軍破麓川蠻渡金沙江乃班師

驥率諸將自騰衝會師由干崖抵沙壩復造舟至金



沙江思機發於西岸埋柵拒守大軍順流下至管屯  
適木邦緬甸兩宣慰兵十餘萬亦列於沿江兩岸緬  
甸備舟二百餘為浮梁濟師併力攻破其柵寨得積  
穀四十餘萬石賊領衆至鬼哭山築大寨於兩峯上  
築二寨為兩翼又築七小寨綿亘百餘里官軍分道  
並進皆攻拔之斬獲無算而思機發思卜發復奔遁  
時王師踰孟養至孟那孟養在金沙江西去麓川千  
餘里諸部皆震讐曰自古漢人無渡金沙江者今王

師至此真天威也驥還兵其部衆復擁任發少子思  
祿據孟養地為亂驥等慮師老度賊不可滅乃與思  
祿約許土目得部勒諸蠻居孟養如故立石金沙江  
為界誓曰石爛江枯爾乃得渡思祿亦懼聽命乃班  
師捷聞帝為告廟

景帝景泰五年緬獻麓川俘誅思機發於京師

先是元年雲南總兵官沐璘奏緬甸宣慰已禽獲思  
機發又將思卜發放歸孟養恐緬人復挾為奇貨不

若緩之聽其自獻便從之至是緬人索舊地左叅將  
胡誌等諭以銀夏等處地方與之乃送思機發及其  
妻子六人至金沙江村誌等檻送京師南寧伯毛福  
壽以聞乃誅思機發成化元年總兵官沐瓚等以思  
任發之孫思命發至京師乃逆賊遺孽不可留請發  
沿海登州衛安置月給米二石從之麓川亡

明史麓川土司傳曰麓川平分其地立隴川宣撫  
司因以恭項為使

恭項者故麓川部長首先歸順  
効力有功因命於麓川故地開

設宣撫并置  
同知等官

正統十一年木邦宣慰罕蓋發來求

麓川故地有司以已設隴川宣撫司建官分管以

孟止地予之報可隴川與木邦相鄰爭地仇殺搆

兵不息嘉靖中土舍多鯨刃兄自襲按問伏辜還

職兄子多參詔貫其罪並戒木邦罕孟毋得復黨

鯨爭職萬厯初宣撫多士寧為其記室岳鳳所鴆

奪印投緬代為宣撫十二年官軍平隴川踰年復

鑄宣撫司印以多士寧之子思順襲為使二十九

年思順死蠻莫思正乘喪襲隴川

萬歷四年緬甸  
莽瑞體叛來招

多士寧其記室岳鳳熙而多智士寧信任之妻以  
妹鳳曲媚士寧陰奪其權與三宣六慰各土舍罕  
拔等捕血盟誘士寧往擺古歸附緬酋陰使其子  
曩烏鳩士寧并殺其妻女受緬偽命為宣撫及瑞  
體死子應襄嗣鳳父子臣服之誘賊官軍獻士寧  
母胡氏及親族六百餘人於應襄盡殺之多氏之  
宗幾盡初鳳為瑞體招諸部拒中國傷官軍逆勢  
浸成緬深倚之久之以緬不足恃而鄧川土知州  
何鈺鳳友婿也使入招鳳開示百方與之盟誓時  
劉鯁鄧子龍各率勁師至鳳懼求降鯁責令獻金  
牌符印及蠻莫猛畜地乃以送鳳妻子還隴川為  
名分兵趨沙木龍山而自領大兵馳入隴川復率  
兵進緬緬將先遁鳳子曩烏亦降鯁乃攜鳳父子  
往攻蠻莫蠻莫賊知鳳降馳報應襄發兵圍隴川

越乘機掩殺賊縛緬人及象馬來獻逆招撫孟養  
賊復移師圍孟璉生禽其魁獻俘於朝帝為告謝  
郊廟時萬曆十二年九月也二十九年莽廐裏分  
道入犯並出隰川多思順不敵奔猛智木幾死思  
正製之陳其妻罕氏三十五年思順于安民以守  
將索賂叛入緬已而緬聽撫遣安民歸安民久據  
蠻營桀驁甚王師亟討其族人挾其弟多安靖誅  
之以獻安民弟安邦治亦附緬後寄居蠻莫其地  
有馬安府黎羅木等山極險  
峻麓川之所恃為巢穴者也

欽定續文獻通考卷二百四十二